

Kesetiaan, Kemahiran, Keupayaan Intelektual Inti Pati Utama Keunggulan Umno - Najib
Bername
May 12, 2014

KUALA LUMPUR, 12 Mei (Bernama) -- Datuk Seri Najib Tun Razak berkata kesetiaan anggota Umno yang diadun dengan kemahiran mengikuti peredaran zaman dan keupayaan intelektual menjadi inti pati utama untuk memastikan parti itu lebih unggul dan gagah pada masa hadapan.

Presiden Umno itu meminta pemimpin-pemimpin dan anggota-anggota parti sentiasa sedia melakukan proses pembaharuan serta penambahbaikan di samping muhasabah diri demi memastikan parti itu terus relevan.

Para pemimpin dan anggota Umno perlu setia kepada parti bagi memastikan parti keramat orang Melayu itu kekal relevan, katanya dalam Facebooknya Isnin.

Mengenai ulang tahun ke-68 Umno yang diraikan semalam, Najib berkata:" Alhamdulillah, semalam adalah hari ulang tahun Umno yang ke-68 dan sambutan tahun ini diraikan dalam majlis bacaan doa selamat dan surah Yasin di Pusat Dagangan Dunia Putra.

"Jauh sudah perjalanan Umno sejak tarikh keramat 11 Mei 1946 di Istana Besar Johor Bahru apabila Kongres Melayu Se-Malaya dan perhimpunan agung pertama Pertubuhan Kebangsaan Melayu Bersatu mencatat sejarah yang begitu penting dalam perkembangan dan pembangunan negara kita," kata Najib.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1037561>